

Najib Ucap Takziah Kepada Keluarga Wong

Bernama

Jun 22, 2014

KUALA LUMPUR, 22 Jun (Bernama) -- Perdana Menteri Datuk Seri Najib Tun Razak pada Ahad mengucapkan takziah kepada keluarga Anggota Dewan Undangan Negeri Bukit Assek Wong Ho Leng, yang meninggal dunia akibat kanser Sabtu malam.

"Saya mengucapkan takziah kepada keluarga dan sahabat handai mendiang pengerusi DAP Sarawak dan Anggota Dewan Undangan Negeri Bukit Assek Wong Ho Leng, yang meninggal dunia semalam," tulis Najib dalam laman Twitter beliau.

Menurut DAP, Wong meninggal dunia pada 10.50 malam Sabtu.

Wong, 54, dikesan menghidap tumor otak pada Januari tahun lepas. Beliau mendapatkan rawatan di Singapura awal tahun ini dan menerima jagaan paliatif di Pusat Perubatan Rejang di Sibu, Sarawak.

Sementara itu, Najib turut mengucapkan takziah kepada keluarga dan rakan-rakan anggota bomba Mohamad Taufik Ali yang maut setelah dilanggar lori tiga tan berisi muatan batu di Batu 29, Pengkalan Raja, Pontian, Johor, semalam.

"Salam takziah kpd keluarga dan rakan2 anggota @bombaJBPM Mohammad Taufik Bin Ali yg kembali ke rahmatullah ketika bertugas smlm. Al-Fatihah," katanya dalam entri Twitter terbaharu beliau.

Kemalangan berlaku semasa Mohammad Taufiq dari Balai Bomba Pekan Nenas dipercayai sedang mengemas peralatan operasi pemadaman api lalang.

Kejadian itu turut menyebabkan rakan mangsa Suboh Abdullah cedera parah.

-- BERNAMA

Copyright © 2014 BERNAMA

Source: <http://www.bernama.com/bernama/v7/bm/newsindex.php?id=1048292>